

ACTA Nº 2019/01
SESIÓN Ordinaria DO PLENO DA CORPORACIÓN
- SALON DE PLENOS, sábado 12 de xaneiro de 2019 -

No día de hoxe, ás 11:00 horas, baixo a presidencia do alcalde, reúnense os concelleiros e concelleiras que se indican, coa asistencia da Secretaria-Interventora, que subscribe, co obxecto de celebrar, en primeira convocatoria, Sesión Ordinaria do Pleno da Corporación.

PRESIDE:

SECUNDINO GARCIA CASAL

ASISTEN:

BNG

MANUEL VARELA MECIAS

SABELA IÑIGUEZ CINZA

MANUEL BECEIRO COUCE

AMPARO CALVO GONZÁLEZ

XESÚS SOTO VIVERO

ANA BELÉN BREIXO GUNDÍN

PP

MANUEL ROMERO CASTRILLON

MARIA BELEN TRIGO MEIZOSO

PSOE

YOLANDA VAZQUEZ PAZOS

AUSENCIAS:

CRISTINA CALVO TUIMIL (PP)

SECRETARIA:

IRIA LUISA DÍAZ GAVELA

Constátase a presenza de membros deste órgano en quórum suficiente, polo que o alcalde, como Presidente, declara aberta a sesión. Procédese a tratar os asuntos incluídos na **ORDE DO DÍA**:

1.- PRONUNCIAMIENTO SOBRE O CARÁCTER ORDINARIO DA SESIÓN PLENARIA.

O alcalde explica que este punto foi incorporado á orde do día por un erro, polo que non procede o seu tratamiento.

2.- APROBACIÓN DAS ACTAS DAS SESIÓNS ANTERIORES: ORDINARIA DE DATA 6 DE NOVEMBRO DE 2018 E EXTRAORDINARIAS DE DATAS 27 DE NOVEMBRO E 19 DE DECEMBRO DE 2018.

Ao non haber ningunha observación, o presidente declara aprobadas por unanimidade as actas das sesións ordinarias de data 6 de novembro de 2018 e extraordinarias de datas 27 de novembro e 19 de decembro de 2018.



3.- DACIÓN DE CONTA DAS RESOLUCIÓNS DA ALCALDÍA DESDE O NÚMERO 209/2018 ATA O NÚMERO 273/2018 DO ANO 2018 E DESDE O NÚMERO 001/2019 ATA O NÚMERO 008/2019.

O Pleno dáse por enterado.

4.- DACIÓN DE CONTA DA RESOLUCIÓN DA ALCALDÍA NÚMERO 223/2018 DE DATA 15 DE NOVEMBRO DE 2018 AO ABEIRO DO PROCEDIMENTO DE CONTRATACIÓN DA OBRA "RENOVACIÓN DE PAVIMENTOS NA AVENIDA MARQUÉS DE FIGUEROA E OUTROS"; (AO ABEIRO DO POS+2018 DA DEPUTACIÓN DA CORUÑA).

O Pleno dáse por enterado.

5.- APROBACIÓN, SE PROCEDE, DA CONTA XERAL DO EXERCICIO 2017 DO CONCELLO DE SAN SADURNIÑO.

Consta no expediente a proposta da alcaldía, ditaminada favorablemente pola Comisión especial de facenda e contas, que se reproduce a continuación:

"PROPOSTA DE APROBACIÓN DA CONTA XERAL DO EXERCICIO 2017

Formada a Conta Xeral do Concello correspondente ao exercicio 2017 e informada favorablemente pola Comisión Especial de Contas en sesión de data 26 de novembro de 2018, esta foi exposta ao público quince días aos efectos de que durante estes e oito máis as persoas interesadas puideran presentar reclamacións, reparos ou observacións.

Tendo en conta, como consta no informe da funcionaria do Rexistro, que non foron presentadas reclamacións, alegacións ou reparos á Conta Xeral, procede elevar ao Pleno a seguinte proposta de acordo:

ÚNICA.- Aprobar a Conta Xeral do Concello de San Sadurniño correspondente ao exercicio 2017 nos termos que constan no expediente, integrada polas contas anuais do concello así como pola documentación complementaria legalmente establecida."

O alcalde cédelle a palabra ao portavoz do BNG, Xesús Soto, que explica que a conta xeral foi ditaminada favorablemente pola comisión de facenda, sendo exposta ao público para alegacións durante o prazo legalmente establecido, polo que procede a súa aprobación definitiva polo pleno para enviar aos organismos que correspondan. O portavoz manifesta que o resultado final da conta é positivo para o Concello de San Sadurniño e que a execución do orzamento é arredor do 80%, polo que entenden que a conta é positiva e que permitiu manter e prestar os servizos que se pretendían no ano 2017, así como levar a cabo os investimentos previstos no anexo de investimentos do orzamento dese ano.

A portavoz municipal do PSOE, Yolanda Vázquez, anuncia a súa abstención en base ao incumprimento da regra de gasto e á elaboración do plan económico-financeiro.

A conceleira do PP, Belén Trigo, explica que na comisión se abstivo porque non tiña mirada toda a



documentación. Chama a atención sobre o feito de que a suma dos capítulos 1 e 2 de ingresos do Concello non é suficiente para pagar os gastos de persoal municipal, a pesar de que hai tres salarios menos e que se incrementaron as taxas.

Incide no manifestado pola portavoz do PSOE sobre o incumprimento do obxectivo de estabilidade e da regra de gasto, o que implica a necesidade de elaborar un plan económico-financeiro. Anuncia o seu voto en contra.

O portavoz do BNG di que se poden facer as contas que se queiran e sumar os capítulos como cada quen quere, pero que o importante é o termo de aforro neto, que amosa que os ingresos correntes son suficientes para fazer fronte aos gastos correntes. Ese aforro é superior aos 500.000 euros, polo que hai unha situación de sostibilidade clara. Manifesta que o feito de que a suma dos capítulos 1 e 2 de ingresos non cheguen para afrontar o capítulo 1 de gastos é algo irrelevante e que se dá porque o Concello de San Sadurniño presta os servizos directamente con persoal municipal e non por medio de outras empresas que irían ao capítulo 2.

O concelleiro manifesta que o plan económico-financeiro está en redacción como consecuencia do incumprimento da regra de gasto e da estabilidade orzamentaria e insta aos partidos da oposición a explicar os incumplimientos nos que basean as súas argumentacións. Explica a continuación que o plan recollerá as causas do incumprimento, que son cuestións de tipo técnico que se dan nunha parte moi importante dos concellos debido á imposibilidade de cumplir coas medidas que impón a lexislación estatal sen aplicar recortes de servizos; así como as medidas para solventar a situación, que irán no sentido de respectar o principio de anualidade orzamentaria co fin de minimizar o contido da conta 413, manter o período medio do pago a provedores por debaixo dos trinta días, adoptar medidas compensatorias en caso de utilizar o remanente de tesourería en caso de superávit orzamentario e traballar nunha maior eficiencia da execución de ingresos e gastos, como se vén facendo nos últimos anos. Manifesta que son medidas sen concreción práctica, como medidas correctoras, pero que non teñen maior trascendencia.

As forzas da oposición declinan realizar máis intervencións, polo que se somete a proposta a votación, resultando **aprobada por sete (7) votos a favor das concelleiras e concelleiros do BNG, dous (2) votos en contra da concelleira presente e concelleiro do PP e una (1) abstención da concelleira do PSOE.**

6.- APROBACIÓN, SE PROCEDE, DA PROPOSTA DA ALCALDÍA EN APOIO AO CONFLITO DAS TRABALLADORAS E TRABALLADORES DOS PUNTOS DE ATENCIÓN CONTINUADA DO SERVIZO GALEGO DE SAÚDE; PREVIA RATIFICACIÓN DA SÚA INCLUSIÓN NA ORDE DO DÍA PARA A TRAMITACIÓN COMO ASUNTO URXENTE.

Consta no expediente a seguinte proposta da Alcaldía, que non foi sometida a ditame da comisión previa, polo que debe ser sometida para a súa consideración de urgente, polo que se procede a someter a votación, sendo **aprobada con oito (8) voto a favor das concelleiras e concelleiros do BNG e PSOE e dous (2) votos en contra da concelleira e concelleiro presentes do PP.**

"PROPOSTA DA ALCALDÍA EN APOIO AO CONFLICTO DAS TRABALLADORAS E TRABALLADORES DOS PUNTOS DE ATENCIÓN CONTINUADA DO SERVIZO GALEGO DE SAÚDE



EXPOSICIÓN DE MOTIVOS

Os PAC, Puntos de Atención Continuada do Servizo Galego de Saúde (SERGAS), distribuidos por toda Galiza, prestan asistencia sanitaria en horario comprendido entre as 15:00 e as 8:00 horas en días laborais e as 24 horas en domingos e festivos. As condicións de traballo regúlanse pola Orde de 4 de xuño de 2008, pola que se publican determinados acordos sobre ordenación e provisión de postos de traballo e condicións de traballo e retributivas no ámbito da atención primaria do SERGAS.

Fai máis de dez meses as traballadoras e traballadores dos PAC presentaron por escrito no SERGAS unha táboa reivindicativa na que se recollían as necesidades deste colectivo para poder realizar o traballo en condicións de seguridade e coa suficiente calidade asistencial, solicitando asimesmo a recuperación de dereitos contemplados na orde que regula as súas condicións de traballo.

As reivindicacións deste colectivo son as seguintes:

- *Equipos paritarios de enfermería e personal médico*
- *Revisión dos plans funcionais de cada PAC para cubrir as necesidades actuais en cada centro*
- *Cumprimento das normativas europeas de tempo de traballo*
- *Dotación de EPIs, segundo se recolle na Lei de Prevención de Riscos Laborais*
- *Cómputo real da xornada realizada e mantemento das 1451 horas de xornada efectiva. Que non se lles apliquen penalizacións en situación de IT ou permisos de conciliación familiar*
- *Eliminación dos obxectivos o ítem de derivación de doentes do PAC ao hospitalaria. Derívanse doentes por patoloxía non por número*
- *Esixencia do pago inmediato do 100% dos complementos de festividade e nocturnidade conxelados desde 2010*
- *Abono de dietas en domingos e festivos por comida e cea*
- *Elaboración de calendarios de traballo dando prioridade ao personal do PAC*

Tras a convocatoria da Comisión Técnica e varias reunións estériles nas cales o SERGAS non achegou ningunha proposta para solucionar e corrixir as demandas presentadas, as traballadoras e traballadores dos PAC, vironse na obriga de ir a unha convocatoria de folga para que as súas xuntas reivindicacións, foran escoitadas

Despois de máis dun mes desa convocatoria o SERGAS fai oídos xordos, coa repercusión negativa que as carencias nos PAC teñen sobre a saúde das persoas usuarias destes servizos

Polo anteriormente exposto, e sendo sanidade pública un dereito irrenunciable de todas e de todos, esta alcaldía propón ao Pleno do Concello de San Sadurniño a adopción do seguinte acordo:

1. *Concello de San Sadurniño mostra a súa solidariedade coas traballadoras e traballadores dos PAC e insta á Consellaría de Sanidade e ao SERGAS a negociar con este colectivo as demandas laborais e asistenciais presentadas.”*





O alcalde explica que se está nun momento de conflitividade na sanidade pública galega, no que as traballadores e traballadoras levan un tempo esixindo ao goberno galego que tome medidas para paliar a situación. Informa de que o persoal dos PAC's fixeron chegar un escrito a todos os concellos da comarca para o seu tratamento e posicionamento das corporacións que o grupo de goberno asume totalmente. A continuación, cede a palabra a un representante dos traballadores e traballadoras para que expoña as súas reivindicacións.

O representante das traballadoras e traballadores explica o funcionamento dos PAC's e as súas funcións. Manifesta que as condicións de traballo foran reguladas no 2008 por unha orde que fora consensuada, pero que a día de hoxe non se están cumplindo desde hai xa máis dun ano, cando xa se plantexou esta situación ao SERGAS sen que ata o momento se dera ningún paso para solucionalo. Pasa a enumerar as reivindicacións que, succinctamente, son as que seguen:

- Igual número de enfermeiras e enfermeiros que de médicos e médicas debido á atención de urxencias que se producen por parte dos PAC's, que requiren atención de más dunha persoa.
- Revisión dos plans funcionais de necesidade de persoal que teñen máis de 12 anos nos que as necesidades cambiaron moito e aumentaron as necesidades sen aumentar o persoal.
- Necesidade de mellorar mesmo os equipos de vestiario para unha atención de situacóns que requiren equipos adecuados.
- Recuperación das horas que se realizan a maior das que corresponden e, mesmo a falta de pago da festividades e nocturnidades.

Manifesta que o anuncio do SERGAS, debido a que a problemática da atención primaria está estendida a toda Galicia, sobre os contactos que van iniciar chega tarde porque non soluciona o problema de falta de persoal e das condicións do mesmo. Manifesta que os problemas que se producen, como o que haberá con pediatría en San Sadurniño, é consecuencia da deixadez da atención primaria. Alerta tamén sobre o contido da reforma anunciada, xa que pode levar concentrar e mesmo anular PAC's.

Pide á corporación que se manteña atenta á situación, porque a única forma de mellorar a atención primaria é coidala economicamente e con oposicións abertas que cubran as necesidades.

Incide en que o problema dos PAC's non é só un problema laboral, senón moito máis amplio da atención primaria.

O alcalde cédelles a palabra aos grupos municipais, intervindo en primeiro lugar o portavoz do BNG, Xesús Soto, que manifesta o seu acordo pleno co exposto polo representante dos PAC's, argumentando que as cifras de atención nos PAC's dan conta da dimensión e gravidade da situación e máis aínda en zonas rurais coma San Sadurniño, sendo básicos para a prestación de servizos sanitarios á poboación. Concorda en que a problemática laboral non é só iso, senón que é o síntoma de que os actuais xestores do SERGAS non acreditan no sistema público sanitario. Manifesta que son más áxiles resolvendo problemas puntuais que teñen que ver coa viabilidade de empresas privadas relacionadas co mundo sanitario, pero que os problemas continuos na xestión directa pública do sistema agrávanse.

Dí que acreditan nas reivindicacións que se veñen de expoñer e que a situación na sanidade tamén é consecuencia dunha modificación pactada da Constitución para garantir a sostibilidade económica das Administracións, sen ter en conta as consecuencias que ten para a posterior prestación dos servizos

públicos; polo que é un problema de modelo, que se plasma nesa modificación constitucional e o posterior desenvolvemento lexislativo que conlevou recortes nos servizos públicos e que apostá pola privatización destes servizos. Incide en que por iso apoian as reivindicacións dos profesionais que son os que están mantendo o nivel da sanidade pública, sendo necesario pór fin á precariedade laboral e dotar dos medios humanos e técnicos necesarios a todos os PAC's do país en base a criterios obxectivos e pactados. Manifesta que en base a isto, desde o BNG defenden a posta en marcha dun plan de choque para investir 200 millóns de euros adicionais no orzamento do SERGAS desde o ano 2019 para paliar todos estes problemas, porque entenden que no século XXI non poden darse situacíons como a acontecida no mes de agosto no PAC da Estrada que faleceu unha persoa por falta de persoal presencial para a súa atención ou no CHUAC, onde o falecemento de dúas persoas está posto en mans da fiscalía dado que tamén poden ter causa na falta de medios humanos. Traslada o apoio ás reivindicacións que se están a levar a cabo coa esperanza de que solucione positivamente para o persoal e para a poboación en xeral.

A portavoz do PSOE manifesta o seu acordo con que o Concello se sume a esta iniciativa, aínda que amosa a convicción de que non son cuestiós políticas, senón que afectan a todos os cidadáns como é ter unha sanidade universal e gratuita.

A concelleira do PP, Belén Trigo, cre que en moitas das cousas teñen razón; pero ten coñecemento de que o SERGAS mantén liñas de diálogo para chegar a un acordo mediante a negociación cos sindicatos e, nalgún dos puntos, xa foi favorable. Di que segundo lle trasladaron nun informe, para asumir o pago do incremento do prezo das gardas deben facer contas, xa que supón un incremento do 6 %, e que aceptan a demanda de subscribir contratos que garantan unha maior estabilidade nas gardas nos centros que precisan máis axuda; aínda que manifesta a súa disconformidade porque consideran que as gardas deberan facerse en todos os centros e non só nos que precisen axuda. Reitera que a Administración ten abertas liñas de negociación e que xa se chegaron a algúns acordos polo que anuncia a súa abstención.

En base a isto, e para darlle a Administración un tempo para ver se é certo que están a traballar, aínda estando de acordo co que piden; van manterse sen posicionarse.

O alcalde abre un turno de réplica no que unha das representantes das traballadoras e traballadores manifesta que o acordo sobre o vestiario ao que accedeu a administración foi relativo ao número de prendas, pero non á adecuación das mesmas para garantir a seguridade, que é o que solicitaba o colectivo. Manifesta que o resto de medidas que puxo sobre a mesa o SERGAS tampouco cumple coas expectativas do colectivo.

O portavoz do BNG mantén que o transfondo do tema é o problema de crenza no modelo e sostibilidade do mesmo ao non apostar pola sanidade pública. Pero máis alá tamén existe un agravio comparativo entre profesionais en función dos centros onde presten a atención sanitaria.

A portavoz do PSOE di que non pode morrer ninguén nun centro de saúde hoxe en día por non ter medios económicos para atender ao persoal.

A concelleira do PP reitera que está de acordo coas reivindicacións na súa maioría, pero que van darlle un marxe á Administración.

O alcalde dá lectura á parte resolutiva da proposta que se somete a consideración plenaria e insiste en que esta situación é unha cuestión de modelo, derivada das modificacións lexislativas para recortarle





dereitos á xente. Manifesta que non ten ningunha confianza no goberno actual, porque non cre neste modelo; xa que o modelo que defenden é o do Hospital de Vigo, de ir privatizando servizos pola porta de atrás; escorándose o modelo cada vez máis á dereita e camiñando cara a situacións como a da sanidade nos EEUU. Di que a cuestión é económica e que nos orzamentos da Xunta non se reflicte a aportación de cartos precisa para solucionala, nin sequera para repoñer todos os médicos que se xubilaron durante a crise. Asegura que o problema non é que non haxa médicos, senón que están noutros lugares.

O portavoz do BNG, Xesús Soto, dá lectura novamente da parte resolutiva para, segundo explica, ver a posibilidade de que o Partido Popular reconsiderase a postura do voto, para intentar acadar un posicionamento unánime. Incide en que o acordo é amosar a solidariedade e instar ao SERGAS a negociar, non se trata de pedir que o SERGAS asuma as súas propostas ao cen por cento.

A concelleira do PP, Belén Trigo, resposta que leran todo o que poña e que a parte na que din que instan á Administración non a comparten, porque son coñecedores de que a Administración ten as liñas abertas de negociación. Reitera o seu acordo coas peticións dos traballadores.

Unha das representantes dos traballadores toma a palabra para explicar que nas novas mesas de negociación non está convidado o colectivo de PAC's.

Non habendo máis intervencións, sométese a moción a votación, resultando **aprobada por oito (8) votos a favor das concelleiras e concelleiros presentes do BNG e a concelleira do PSOE e dúas (2) abstencións da concelleira e concelleiro do PP.**

7.- APROBACIÓN, SE PROCEDE, DO 3º PLAN DE IGUALDADE DE OPORTUNIDADES ENTRE MULLERES E HOMES DO CONCELLO DE SAN SADURNIÑO 2019-2020; PREVIA RATIFICACIÓN DA SÚA INCLUSIÓN NA ORDE DO DÍA PARA A TRAMITACIÓN COMO ASUNTO URXENTE.

Consta no expediente a seguinte proposta da concellería de igualdade, que non foi sometida a ditame da comisión previa, polo que debe ser sometida para a súa consideración de urgente, polo que se procede a someter a votación, sendo **aprobada con oito (8) voto a favor das concelleiras e concelleiros do BNG e PSOE e dous (2) votos en contra da concelleira e concelleiro presentes do PP:**

"PROPOSTA DA CONCELLEIRA DE IGUALDADE DE APROBACIÓN DO III PLAN DE IGUALDADE DE OPORTUNIDADES ENTRE MULLERES E HOMES DO CONCELLO DE SAN SADURNIÑO

É un orgullo como Concelleira de Igualdade, dar a coñecer o III Plan de Igualdade de Oportunidades entre mulleres e homes do Concello de San Sadurniño.

Dende hai tempo preocupámonos en estar pendentes da consecución dos fins e obxetivos para acadar a igualdade entre mulleres e homes. E por iso que vimos traballando para que as mulleres do Concello de San Sadurniño teñan a posibilidade de gozar da súa vida persoal, familiar e social e dos mesmos dereitos dos homes, e que toda a cidadanía sexa sensible desta necesidade.

É certo que nos últimos anos, e debido a constante loita de numerosos colectivos, apoiados polas propias administracións públicas, se conseguiron importantes avances, coa conseguinte mellora nas condicións de vida de mulleres, pero ainda queda moito camiño por percorrer e moito que avanzar.



Ao servizo destes fins elaborouse este III Plan de Igualdade de Oportunidades entre Mulleres e Homes que é unha continuidade do anterior, xa que o logro da equidade de xénero debe entenderse como un traballo estable e continuo ao longo dos anos e non como un obxectivo a curto prazo. Seguiremos a construir políticas de igualdade que faciliten a conciliación da vida laboral e familiar, a inserción das mulleres ao emprego, incrementar as actuacións de sensibilización e prevención da violencia de xénero, seguir levando a cabo programas no ámbito educativo e vecinal que sensibilicen valores que reforcen a igualdade entre mulleres e homes, seguir tentando derribar o patriarcado que nos ten a todas e todos sometidos. Para todo isto creemos que a educación é a principal canle e por iso seguimos apostando por traballar nesta linea e así poder chegar a acadar a igualdade real.

A elaboración deste novo Plan de Igualdade parte dos datos de análise do anterior así como da implicación do persoal técnico do concello. Este III Plan de Igualdade sigue indo moito más aló que boas intencións, xa que nos seguimos a marcar as competencias que cada área de goberno e cada departamento debe asumir, sendo así todas e todos partícipes do seu cumprimento.

Aínda que son consciente de que non é sinxelo o camiño a esa igualdade real, mais dende logo por nós non vai quedar, con traballo e entusiasmo faremos a achega que nos corresponde do mesmo xeito que vos convido a que colaboredes neste proxecto de forma activa e participativa para construír unha sociedade máis xusta e igualitaria...CAMIÑANDO POLA IGUALDADE.

O Plan que se presenta conta igualmente con informe favorable emitido a data de 8 de xaneiro de 2019 da traballadora social municipal: María Cristina Paz Galindo, colexiada número 697 no Colexio Oficial de Traballo Social de Galicia

Tendo en conta o anteriormente exposto propón ó Pleno do Concello a adopción do seguinte acordo:

PRIMEIRO.- Aprobar o III Plan de Igualdade de oportunidades entre mulleres e homes do Concello de San Sadurniño que terá unha vixencia de dous anos (2019-2020)

SEGUNDO.- Publicitar e dar difusión, tanto á poboación xeral como ás entidades e organismos públicos correspondentes e implicados directamente no ámbito da igualdade, da aprobación e posta en funcionamento do III Plan de Igualdade de Oportunidades entre mulleres e homes do Concello de San Sadurniño."

O alcalde cédelle a palabra á concelleira de igualdade, Ana Belén Breixo, que explica que unha vez rematado o prazo de aplicación do segundo plan de igualdade, procede a aprobación do terceiro. Dá lectura á proposta.

A portavoz do PSOE, Yolanda Vázquez, manifesta o seu acordo co plan e o voto favorable á súa aprobación.

A concelleira do PP, Belén Trigo, maniféstase en igual sentido.

Non habendo máis intervencións, sométese a moción a votación, resultando aprobada por unanimidade.

8.- APROBACIÓN, SE PROCEDE, DA ADHESIÓN DO CONCELLO DE SAN SADURNIÑO AO PROGRAMA XANTAR NA CASA DA XUNTA DE GALICIA; PREVIA RATIFICACIÓN DA SÚA INCLUSIÓN NA ORDE DO DÍA PARA ATRAMITACIÓN COMO ASUNTO URXENTE.

Consta no expediente o seguinte informe-proposta da área de servizos sociais, que non foi sometida a



ditame da comisión previa, polo que debe ser sometida para a súa consideración de urxente, polo que se procede a someter a votación, sendo **aprobada con oito (8) voto a favor das concelleiras e concelleiros do BNG e PSOE e dous (2) votos en contra da concelleira e concelleiro presentes do PP.**

"INFORME TÉCNICO MUNICIPAL

CONVENIO DE COLABORACIÓN ENTRE O CONSORCIO GALEGO DE SERVIZOS DE IGUALDADE E BENESTAR E O CONCELLO DE SAN SADURNIÑO PARA O DESENVOLVEMENTO DO PROGRAMA XANTAR NA CASA NO CONCELLO DE SAN SADURNIÑO

ANTECEDENTES

O Consorcio Galego de Servizos de Igualdade e Benestar (en diante o Consorcio), foi creado en virtude do convenio de colaboración subscrito o 3 de xullo de 2006, e ten como misión primordial, de acordo co artigo 6 dos seus estatutos, publicados no DOG do 7 de xullo de 2006, a participación na dirección, avaliación e control da xestión dos servizos sociais de ámbito local no ámbito territorial dos entes consorciados.

O Consorcio está a desenvolver, de acordo coas súas finalidades e competencias, o programa "Xantar na Casa", un servizo de comida a domicilio co que se pretende facilitar e garantir unha alimentación equilibrada e de calidade adaptada ás necesidades das persoas maiores e/ou dependentes, que non poden valerse por si mesmas para cubrir as súas necesidades básicas relacionadas coa compra ou elaboración de menús.

O programa Xantar na Casa artéllase a través da xestión por parte do Consorcio en colaboración coa Consellería de Política Social e cos concellos consorciados e forma parte do conxunto de servizos promovidos pola Dirección Xeral de Maiores e Persoas con Discapacidade dependente desa consellería.

O Concello de San Sadurniño iniciou no mes de outubro unha pesquisa das posibles persoas interesadas neste programa, do que mostraron un interés real en ser informadas do mesmo un total de 6 persoas. Ademáis o grao de envellecemento da poboación, a dispersión rural, o alto número de persoas en situación de dependencia e as situacións de illamento aconsellan a participación municipal no citado programa.

CONSIDERACIÓN TÉCNICAS

Os obxectivos específicos que se queren acadar son os seguintes:

- Proporcionar ás persoas beneficiarias unha alimentación de calidade e nutritiva, atendendo os casos de xeito individualizado e profesionalizado.
- Evitar o deterioro da calidade de vida das persoas maiores e/ou dependentes por teren unha dieta inadecuada.
- Previr situacións de risco que se poidan producir no proceso de elaboración da comida.
- Facilitar un respiro ás familias e aos cuidadores e impulsar medidas de apoio á conciliación da vida familiar e laboral das mulleres.
- Facer un seguimento e acompañamento individualizado de cada usuario/a do servizo por parte dos profesionais que acoden aos domicilios.

PERSOAS BENEFICIARIAS: Serán beneficiarias do programa "Xantar na Casa" as persoas empadroadas e que sexan residentes no concello e que cumpran os seguintes requisitos:

1º) Persoas maiores de 60 anos, que teñan limitada a súa capacidade de autonomía persoal, e sen rede de apoio que puidese suplir tal situación.

2º) Persoas dependentes, que carezan de apoio familiar, e requiren de axuda para a preparación de alimentos.

3º) Persoas menores de 60 anos en situación de exclusión social, tecnicamente avaliada polos servizos sociais do Concello e sempre que se estea intervindo desde outro programa para resolver a súa situación de exclusión.

Non obstante, antes de iniciarse o servizo, previa aprobación polo Consorcio do mesmo e a sinatura do Convenio, sería adecuado a aprobación dunha normativa reguladora do servizo para o Concello de San Sadurniño que permita establecer os criterios de selección das persoas usuarias e a documentación que deben presentar no marco das normas básicas do programa establecidas polo Consorcio e recollidas no convenio asinado. Desta forma, o consorcio garantiría ás persoas beneficiarias do programa a entrega, cando menos, unha vez á semana no domicilio indicado, do xantar para os sete días da semana durante o período en que se atopen de alta no servizo.

MENÚS EQUILIBRADOS: A alimentación dos usuarios será completa e equilibrada, variada e adaptada ás súas necesidades, os seus gustos e hábitos. Todos os menús estarán supervisados por persoas técnicas especialistas en nutrición.

FINANCIAMENTO E PAGO: O custo máximo do servizo de xantar sería de 7,5 euros por persoa e día. Desta cantidade a persoa beneficiaria achegará o 26,67%, o Concello achegará o 26,67%, e o Consorcio 46,66% restante. As achegas do Concello faríanse con cargo á partida prevista para os ditos efectos nos seus orzamentos. Tendo en conta que propónse unha previsión de 7 persoas usuarias a contía total de aportación municipal anual estimase que acadaría un total de 4620,58 euros, contabilizando un servizo de 11 meses de duración.

Calquera bonificación á parte correspondente á achega da persoa usuaria correría por conta do Concello, con cargo ós seus orzamentos. O Concello debería comunicar ó Consorcio a contía da bonificación, acordando entre ámbalas partes a forma de liquidación da mesma.

O Concello deberá comunicar ademais ao Consorcio todas aquelas subvencións que reciba para o financiamento da súa achega, no que se refire tanto á súa contía como á institución emisora.

O Concello aboará ao Consorcio o importe da súa achega, con cargo á partida prevista para tal fin nos seus orzamentos, cunha periodicidade trimestral, unha vez practicada polo Consorcio a liquidación correspondente ao dito período.

COMUNICACIÓN: O Consorcio e o Concello designarán, cada un deles, unha persoa que se responsabilizará do cumplimento da obriga de comunicación recíproca das partes, e do tratamento e xestión de toda a información relativa ao desenvolvemento do programa "Xantar na Casa".





COMISIÓN DE SEGUIMENTO: A vixilancia e seguimento do convenio encomendaríase a unha comisión mixta integrada polo Xerente do Consorcio e o Alcalde(sa) do Concello, ou persoas en quen deleguen, que se reunirá cando así se solicite por calquera das partes.

A dita comisión terá como funcións: a coordinación, avaliación, e seguimento das actuacións estipuladas neste convenio, así como a resolución das dúbidas e discrepancias que poidan xurdir na interpretación e aplicación do convenio.

Estímase favorable a adhesión ó convenio no marco de colaboración entre o Consorcio Galego e o Concello de San Sadurniño para o desenvolvemento do programa Xantar na Casa neste Concello, para que o Concello facilite ó Consorcio, tras a correspondente avaliación dos Servizos Sociais municipais e aprobación polo órgano competente municipal, unha relación dun máximo de 7 futuras persoas beneficiarias do programa.

Non obstante, como indicamos, antes de iniciarse o servizo, previa aprobación polo Consorcio e a sinatura do citado onvenio, sería adecuado a aprobación dunha normativa reguladora do servizo para o Concello de San Sadurniño que permita establecer os criterios de selección das persoas usuarias e a documentación que deben presentar no marco das normas básicas do programa establecidas polo Consorcio e recollidas no convenio asinado.

O número máximo de persoas beneficiarias do programa podería ser modificado por acordo das partes, mediante a sinatura da correspondente addenda de modificación do convenio asinado, atendendo ás necesidades detectadas e á existencia de crédito adecuado e suficiente no orzamento das partes asinantes para financiar as obrigas derivadas do mesmo.

Este convenio tería unha duración de catro anos. Non obstante, en calquera momento antes da finalización do dito prazo poderíase acordar unanimemente por ámbalas partes a súa prórroga por un período de ata 4 anos adicionais ou a súa extinción.

A vixencia do convenio quedaría condicionada á existencia de crédito adecuado e suficiente no orzamento das partes asinantes para financiar as obrigas derivadas do mesmo.

Tendo en conta o anteriormente exposto propoño ó Pleno do Concello de San Sadurniño a adopción do seguinte acordo:

PRIMEIRO.- O compromiso de incluír nos orzamentos dos exercicios aos que afecta o convenio do importe correspondente á achega municipal que deba satisfacerse. Tendo en conta que proponse unha previsión dun máximo 7 persoas usuarias, a contía total de aportación municipal anual estímase que acadaría un total de 4620,58 euros, contabilizando un servizo de 11 meses de duración para o ano 2019.

SEGUNDO.- Aprobar o convenio de colaboración entre o Consorcio Galego de Servizos de Igualdade e Benestar e o Concello de San Sadurniño para a realización do programa de xantar na casa que figura como anexo e que se xunta á presente proposta."

O alcalde cédelle a palabra ao portavoz do BNG, Xesús Soto, que explica que se trata dun programa de servizo de comida a domicilio para as persoas maiores e/ou dependentes que garante unha alimentación saudable e equilibrada, que forma parte do catálogo de servizos da Xunta e que se financia con unha aportación do 50% por parte da Xunta, un 25% polo Concello e o outro 25% por conta das persoas usuarias. Explica que o abono da achega do Concello ao Consorcio sería trimestralmente e o



funcionamento sería mediante unha oferta de servizo á poboación, unha primeira valoración das persoas que cumplen os requisitos que marca o regulamento e a a realización dunha proposta ao Consorcio que é o organismo que valida e elabora a listaxe de persoas que terán ese servizo.

A portavoz do PSOE, Yolanda Vázquez, di que está de acordo, xa que é unha mellora máis para os veciños do concello que se suma ao Centro de Día e ao SAF.

A concelleira do PP, Belén Trigo, manifesta que tamén lles parece ben a proposta porque é necesario pola cantidade de persoas que necesitan dese servizo e agarda que poida incrementar o número de prazas.

O concelleiro do BNG, Xesús Soto, matiza que está de acordo coa demanda do incremento de prazas, pero que quen marca o número de prazas é o Consorcio, que depende de Política Social da Xunta, e a día de hoxe hai adheridos a este programa 170 concellos e o número de persoas beneficiarias son sobre 1800; polo que cre que o programa debería desenvolverse para crear unha maior oferta que cubra as necesidades da poboación. Critica que existen programas da Xunta nos que se gasta máis en publicidade ca no propio contido do mesmo.

Non habendo máis intervencións, sométese a moción a votación, **resultando aprobada unanimidade.**

9.- MOCIÓN DO GRUPO MUNICIPAL DO BNG SOBRE PARA A APLICACIÓN DE FÓRMULAS DE REPARTO OBXECTIVO NAS SUBVENCIÓNDS DA XUNTA DE GALIZA; PREVIA RATIFICACIÓN DA SÚA INCLUSIÓN NA ORDE DO DÍA PARA A TRAMITACIÓN COMO ASUNTO URXENTE.

Consta no expediente a seguinte moción do grupo municipal do BNG, que non foi sometida a ditame da comisión previa, polo que debe ser sometida para a súa consideración de urxente, polo que se procede a someter a votación, sendo **aprobada con oito (8) voto a favor das concelleiras e concelleiros do BNG e PSOE e dous (2) votos en contra da concelleira e concelleiro presentes do PP.**

"MOCIÓN PARA A APLICACIÓN DE FÓRMULAS DE REPARTO OBXECTIVO NAS SUBVENCIÓNDS DA XUNTA DE GALIZA.

EXPOSICIÓN DE MOTIVOS

Os concellos somos a administración más próxima á ciudadanía, estando en contacto directo coa veciñanza, a administración cun menor endebedamento e tamén asumimos competencias impropias, que deberían asumir outras administracións.

Cada concello ten as súas circunstancias e prioridades, e deberíamos contar cun financiamento axeitado, onde se nos permita decidir en que se invisten os fondos, e non depender dun reparto de fondos discrecional. O Plan Único, creado en 2017 polo Goberno da Deputación Provincial da Coruña, unifica os antigos plans de investimentos da Deputación da Coruña (POS, PAS e PAI) e 11 liñas de subvencións nunha única convocatoria anual, permitindo aos concellos non só unha mellor planificación, senón maior axilidade na tramitación, máis autonomía local para decidir en que invisten os fondos provinciais e máis transparencia na asignación de recursos, xa que os fondos do POS se distribúen con base en criterios obxectivos como a poboación, superficie, número de parroquias e esforzo fiscal do concello.

O Plan Único da Deputación Provincial é un plan vivo e dinámico, que medra ao longo do exercicio e que nos tres anos que leva en funcionamento supera en 144 millóns de euros o investimento dos plans do anterior

gobierno durante 2012, 2013 e 2014.

O programa demostrou ser un instrumento útil para que os concellos afronten as súas necesidades concretas e mellorou e simplificou as relacións entre os concellos e a Deputación Provincial da Coruña.

Este sistema debe ser o camiño tamén para outras administracións públicas, xa que ofrece total transparencia na asignación de fondos e permite total autonomía municipal para decidir en que investir en cada concello.

O noso grupo municipal quere reclamar á Xunta de Galiza transparencia no reparto de axudas e, en definitiva, que muden as formas de actuar por un modelo propio do século XXI, onde non procede o escurantismo e a utilización de fórmulas de reparto de fondos arbitrarias moi pouco obxectivas.

A Xunta de Galiza reparte "a dedo" moitos fondos económicos dende Augas de Galiza ou dende a Consellería de Infraestruturas, entre outros entes, adxudicando convenios nominativos con aqueles concellos onde máis réditos políticos observe obter. Por outro lado, innova con propostas de concorrencia competitiva con convocatorias totalmente descoñecidas de antemán, convocatorias con inicio do período de solicitudes calquera día ás 00.00 horas da noite, esgotándose o crédito xa ás 00.13 horas desa mesma noite, nun claro e infumábel exercicio de escurantismo e caciquismo programado.

Débense cambiar as políticas da Xunta de Galiza e ter que deixar de mendigar axudas. O que propoñemos é que os fondos para os concellos se repartan de xeito obxectivo como se fai dende hai anos na Deputación Provincial da Coruña.

Polo anteriormente exposto, o grupo municipal do BNG, solicita do Pleno da corporación municipal a adopción do seguinte

ACORDO

O Concello de San Sadurniño acorda instar ao Goberno galego a:

1º) Establecer as partidas non finalistas dentro do capítulo de transferencias totais da Xunta de Galiza con destino ás entidades locais, así como de determinadas subvencións que os concellos perciben anualmente de xeito recorrente coa conseguinte modificación da porcentaxe de participación, coa finalidade de integralas no Fondo de Cooperación Local.

2º) Crear un fondo específico anual formado polas transferencias non executadas no orzamento de Xunta de Galiza con destino ás entidades locais.

3º) Estabelecer neste exercicio 2019 os criterios que rexan o reparto das subvencións da Xunta a favor das entidades locais, obxectivos e consensuados coa Fegamp, e que garantan a igualdade de acceso para todas elas cunha convocatoria pública á que concorreran todos os concellos en igualdade de oportunidades.

4º) Que Augas de Galiza asuma fórmulas para que o Canon da Auga que pagamos en todos os concellos do país con abastecementos públicos de auga se reparta con criterios obxectivos de reparto, abrindo unha convocatoria por concorrencia competitiva para todos os concellos do país."


O alcaldé cédeelle a palabra ao portavoz municipal do BNG, Xesús Soto, que explica que esta moción responde á preocupación que o seu grupo ten a respecto do finanzamento local e á existencia de Administracións que á hora do reparto de fondos non trata ao resto de administracións por igual,

concretamente no ámbito da administración autonómica.

Explica que a moción na parte expositiva pon en valor o funcionamento da Deputación provincial da Coruña que reparte os fondos para os Concellos en base a criterios obxectivos e acordados entre todos os grupos políticos e que teñen o respaldo da institución desde hai 20 anos. Deste xeito, cada concello sabe desde o inicio do ano con que recursos vai contar.

Considera que a Xunta deberá tender a implantar este formato de financiamento para os concellos e pon como exemplo que, desde hai dez anos que o Partido Popular goberna na Xunta, o Concello de San Sadurniño non obtivo financiamento para ningún proxecto por parte da Xunta de Galicia, máis alá dos obtidos por medio de convocatoria de concorrencia competitiva. Enumera a falta de investimento de Augas de Galicia para abastecementos ou saneamento, para loita contra incendios ou infraestruturas e incide na falta de financiamento para un abastecemento na zona de Piñeiro que ía ser obxecto de convenio coa Xunta e que, tras ter mandando modificar o proxecto, segue sen realizar ese convenio.

Manifesta que o goberno de San Sadurniño non pretende ningún trato de favor e que o único que pretende é que se utilicen fórmulas de reparto dos impostos que paga todo o mundo para repartilos en igualdade de condicións e que os fondos para subvencións non finalistas que se reparten por medio de subvencións, competitivas ou non, integren o fondo de cooperación local, que é o único fondo no que participan todos os concellos con criterios finalistas. E no relativo a subvencións finalistas con financiamento europeo, que arbitre liñas de concorrencia competitiva para todos os concellos.

Dá lectura da parte resolutiva da moción presentada.

A portavoz do PSOE, Yolanda Vázquez, manifesta o seu acordo con que sexan obxectivos no reparto; pero amosa o desacordo coa expresión "reparto a dedo" que se contén no texto da moción.

O alcalde di que pode corrixirse esa expresión e substituíla por "arbitriariamente".

A concelleira do PP, Belén Trigo, di que a Xunta comparte a necesidade dunha revisión do modelo de financiamento local e a reforma da Lei de Facendas Locais para garantir a autonomía e a suficiencia financeira das facendas locais. Pero quen debe clarificar este sistema de financiamento é o Estado e unha vez feito iso, abrirase un diálogo para deseñar o futuro das relacións financeiras entre a Xunta e as entidades locais. A respecto do Fondo de Cooperación Local xa garante que todos os concellos teñan un mínimo. Sinala que as dúbidas danse no reparto de convenios que van aparte e que as veces se reparten dun xeito un pouco arbitrario por parte da Xunta. Manifesta tamén que coa inclusión do Fondo de compensación local no fondo de cooperación local poderían darse unha serie de problemas, debería delimitarse qué subvencións se incorporarían para delimitar competencias entre distintas áreas sectoriais da Xunta de Galicia, xa que nalgúns casos podería haber subvencións que non encadran nas competencias de todos os concellos. Sinala ademais que esas actuacións contan con fondos do Estado e tamén autonómicas, polo que van estar supeditadas aos orzamentos de anuais de ambas administracións. Manifesta que a Xunta mantén coa FEGAMP liñas de diálogo abertas a respecto do Fondo de Cooperación, existindo reunións e colaboración, para o que se establece a mesa de coordinación.

O portavoz do BNG, Xesús Soto, matiza que as liñas de colaboración entre a FEGAMP e a Xunta son basicamente para unha liña que é cando hai competencias autonómicas que a Xunta non quere pagar e se xunta co FEGAMP e acordan que os concellos asuman estes custos. Pon como exemplo os GES, o problema da vespa velutina ou a prevención de incendios que lle veñen xerando custos aos concellos coa





aquiescencia da FEGAMP. Insiste en que non se está poñendo en entredito a relación entre Xunta e FEGAMP, mesmo que podería cualificarse como demasiado boa. Sinala que do que se trata aquí é de situacións como a existencia de convenios para repartir a dedo entre 62 concellos 35 millóns de euros para saneamentos e traídas de auga, dos que 57 son concellos do Partido Popular, 6 do PSOE e 2 para concellos gobernados por grupos independentes. Ou cando se articulan liñas de concorrenza non competitiva que se agotan en 12 minutos, abríndose a convocatoria un venres ás 12 da noite. Convida a imaxinar a situación se iso acontecería nunha liña de concorrenza non competitiva para subvencións sacada polo Concello de San Sadurniño.

O portavoz do PP di que en San Sadurniño se fai de xeito parecido.

O portavoz do BNG aconséllalle ao portavoz do PP que vaia a un Consello de participación veciñal e vexa como se elaboran as liñas de subvencións e como se aporta por parte do movemento asociativo e se pactas as modificacións. Conclúe sinalando que a demanda do BNG é que se adopten fórmulas de reparto de fondos distintas e igualitarias e que se poida participar no reparto por parte de todos os concellos.

O alcalde propón modificar a expresión "a dedo" contida na parte dispositiva do texto pola expresión "*discrecionalmente*", quedando a oración do seguinte xeito: "*A Xunta de Galiza reparte discrecionalmente moitos fondos económicos desde Augas de Galiza ou desde a Consellería de Infraestruturas, entre outros entes, adjudicando convenios nominativos con aqueles concellos onde más réditos políticos observe obter.*" Manifesta que os grupo locais deberán ter autonomía para dicirlle á Xunta o que consideren e neste caso trataríase de pedirlle que cumpra a lei, sendo respectuosa tratando a todos por igual.

Non habendo máis intervencións, sométese a moción a votación, resultando **aprobada por oito(8) votos a favor das concelleiras e concelleiros presentes do BNG e a concelleira do PSOE e dous (2) votos en contra da concelleira presente e concelleiro do PP.**

10.- MOCIÓN URXENTES.

Non hai mocións por vía de urxencia, polo que se pasa ao punto seguinte.

11.- ROGOS E PREGUNTAS.

Non se formulan rogos.

O alcalde abre a quenda de preguntas.

O portavoz do PP, Manuel Romero, pregunta pola dispoñibilidade de locais para a oposición, tendo en conta que cando o BNG estaba na oposición pedía locais e despois de 12 anos de goberno, levan anos prometendo locais para os grupos da oposición que áinda non están a disposición. Pregunta se hai algúun avance ao respecto.

O alcalde resposto que hai un avance substancial con respecto a hai 12 anos, xa que daquela non se permitía o uso dos locais municipais aos grupos da oposición, mesmo solicitado un local para un mitin foi concedida a Praza do Campo da Feira. Sinala que agora todos os grupos poden utilizar os locais municipais sen máis problema que os propios de ocupación. Para ter locais para oficinas hai que buscar ubicación física, porque cada vez os servizos municipais precisan máis locais e ter unha oficina para os




grupos políticos podería ser infrutilizar os espazos que hai. Recoñece que é un dereito dos grupos municipais e que haberá que estudalo. Insiste na dispoñibilidade para os grupos municipais de calquera local público municipal ou de calquera entidade que reciba axudas municipais.

O portavoz do PP insiste na necesidade dun local para gardar documentación, non para xuntarse, que para iso serven os locais municipais. Ao que o alcalde lle resposta que cada vez as novas tecnoloxías facilitan o arquivo da documentación.

O portavoz do PP di que o paseo que hai á beira do Río Xubia presenta unha necesidade de mantemento na parte de madeira, porque se esbarra, e tamén na parte do cemento, que precisa de mantemento. Pregunta se teñen coñecemento da situación e se teñen pensado facer algo.

O alcalde di que se tratará de buscar un tratamiento ou métodos para evitar esbaróns e que na actualidade cóntase con un contrato específico para o seu mantemento en traballos de desbroces.

Ao non haber asuntos que tratar, a presidencia declara rematado o acto cando son as 12:16 horas, de todo o que, como secretaria, dou fe.

O alcalde
Secundino García Casal


A secretaria
Iria Luisa Díaz Gavela

